

De Paoskoe

Alleent . . umdät steeds meer onbenullen 't idee opvatten iets – ärgens van te mutten vinnen en dan veural via de *(a)-sociale media* een bonke lewaai te produceren, euren wi'j now weer 't gekrakeel aover de kippekukenties die op niet netuurlijke wieze uut een ei bint ekommen, maer met eulpe van een broedmechine. En dät 't dieronvriendelijk zolle wèèn dieren veur menselijk vermaek te gebruiken.

Kukenties die 't altied zo skattig dejen met Paosen, as symbool van ni'j lèven. Kukenties wöör ik as kind meraekels van ebbe genöten en ook altied naor uut keken *(de etalages met de die donsböllegies onder de rooie wärmtelampe)*, wörren 't now al as wel bi'jzondere ni'jsgaring ebrach, dät ter wel 50 meldingen binnen edaon aover opstellingfen met lèvende kukenties. **(SBS6- veurop !)**.

Now ma-j niet ies meer as opa vertellen dät die kleine rondkuierende donsböllegies, niet as pluzebiesien in China bint emaaft, maer echt lèvend bint en uut een *(kippe-)ei* kommen.

't Wörren tied dät die blaoskaken now ies zollen beseffen dat dät vermuu'iende totaal onbenullige geneuzel. . de mensen zo lankzaemerand de strotte uut giet angen. Aol der toch astoeblijft op met.

Toen de biesten nog nörmaal deel uit maakten van de menselijke voedselketen was men bliede een stukken Paoskoe te kunnen bestellen.

Een Paoskoe ? . . jao . . gien Paos-aze . . *want die bint van sukela*, maer een echte lèvende koe of bolle wöör voldoende vleis anzatten. Onlangs kregge ik nog een foto op-estuurd van zo'n Paoskoe. Een kleindochter ad disse foto altied bi'j aer op de skörstienmantel staon umdät aer opa *(de slager)* der op stonnen met zo'n paoskoe. En dan weet ie 't wè . . dan e-k ter zomaer een verael bi'j.

Zo'n paoskoe wier in anloop naor de **Paosen**, speciaal deur de slager uut-ezöch en op-ekoch en die gonk ter dan **vol trots** met langes zien klanten of stallen 't dier veur zien winkel.

De mensen mochen dan angèven welk stuk van de koe veur un reserveert moch wörren. Of men bestellen een pörtie vleis veur 't Paosfeest.

As der dan voldoende kopers waeren, ad de koe mooi pech en mog disse zonder verdere discussie deelnemen an de voedselketen en wier deur de slager eslach.



slager Ter Moolen - Assendörperstraote - met zien pronkstuk veur de Paosen

Toen ik onlangs een tillevisie-reclame zagge, aover 't gezamenlijk kopen van een koe, (*deur via internet alvaste vleis te bestellen*) kwamp bi'j mi'j 't verael van de paoskoe weer boven . . . en angezien 't now weer Paosen is . . . *vandöör!*

Of te wel . . . der ik niks ni'jmoeds an dät gedoe . . . allenig numen ze 't now anders en doen ze asof ze 't ebben uut-evunnen. Maer goed . . . umdät thuus-slachten al eel lange verböden is en alle vleis vanuut slachter'jen kommen, is ook 't paraderen met een paoskoe niet meer van disse tied.

Ik kanne mi'j trouwens niet erinneren 't ooit zelf ezien te ebben, maer de paoskoe van slager **ter Moolen** van de *Assendörperstraote* wazzen niet de iegiste. Veurige wèke e-k nog een foto an de collectie toe-evoegd van een andere Paoskoe. (*beide biesten lieken trouwens meer op een bolle.*)

Zo gongen dät dus in die olde verlèden tied . . . De slagers waeren nog strots op un ambacht en de klanten tevrèden as de beste man een goed stuk vleis kon bieden.

Toen waeren der nog niet zo völle van die domme koeien die ons van alles wies willen maken.

Ik gao wel weer an de eier . . . strakkies krie-j döör ook nog gekakel aover dat de kippen wel an de leg bint maer dät ter gien ane an te passe is ekommen, . . . foeí toch . . . wat onnetuurlijk . . .



Paoskoe van slager Poppe - Rembrandtlaan

Maer as Paosen symbool is van de aoverwinning en een ni'j tiedpärk, zullen wi'j dit ook maer weer an ons veurbi'j laoten gaon . . . *prettige Paosdaegen.*

20 april 2019

